

**UDRUŽENJE MUZIČKIH/GLAZBENIH I BALETNIH PEDAGOGA
U FEDERACIJI BOSNE I HERCEGOVINE**

**POSLOVNIK
O RADU SAVJETA
FEDERALNOG TAKMIČENJA/NATJECANJA
UČENIKA I STUDENATA MUZIKE/GLAZBE**

Sarajevo, juni 2026.

Na osnovu člana 9. Statuta Udruženja muzičkih/glazbenih i baletnih pedagoga u Federaciji Bosne i Hercegovine (u daljem tekstu: Udruženje), Upravni odbor Udruženja (u daljem tekstu: Upravni odbor) Udruženja, na Sjednici održanoj 19. 06. 2026. godine, u Sarajevu, donosi:

POSLOVNIK O RADU SAVJETA FEDERALNOG TAKMIČENJA/NATJECANJA UČENIKA I STUDENATA MUZIKE/GLAZBE

OPŠTE ODREDBE

Član 1.

Ovim Poslovnikom o radu Savjeta Federalnog takmičenja/natjecanja učenika i studenata muzike/glazbe (u daljem tekstu: Savjet / Poslovnik) uređuje se način rada Savjeta, a naročito: konstituisanje Savjeta, nadležnosti Savjeta, prava i dužnosti članova Savjeta, priprema, sazivanje i odlučivanje na sjednicama Savjeta kao i druga pitanja od značaja za rad Savjeta Federalnog takmičenja/natjecanja. Posebno se naglašavaju nadležnosti i ovlasti Savjeta čiji rad nije u koliziji sa organizacijskim obavezama škole-domaćina ili Organizacionog odbora Federalnog takmičenja/natjecanja.

Poslovnik usvaja Upravni odbor.

Član 2.

Federalno takmičenje/natjecanje učenika i studenata muzike/glazbe je jedna od osnovnih djelatnosti Udruženja u kojem učestvuju učenici osnovnih i srednjih muzičkih/glazbenih škola, te studenti muzičkih akademija u FBiH (Statut Udruženja, član 8.). Organizuje se svake godine u domaćinstvu druge škole o čemu odluku donosi Upravni odbor.

Federalno takmičenje/natjecanje se u smislu odabranih disciplina organizuje trijenalno:

- I : Solo pjevanje, Klavir, Udaraljke, Gudači
- II : Kamerni ansambli i Orkestri
- III : Hor/Zbor, Gitara, Puhači/Duvači, Harmonika i Klasični balet

Discipline Solfeggio (pismeno i usmeno) i Teorija muzike (pismeno) se organizuju naizmjenično bijenalno.

Upravni odbor na prijedlog Savjeta Federalnog takmičenja/natjecanja može donijeti odluku i o drugačijem načinu i rasporedu organizacije.

Federalno takmičenje/natjecanje odvija se prema nizu utvrđenih propozicija, pravila i procedura. Takmičarima se prema postignutim rezultatima izdaju diplome koje potpisuju predsjednik Savjeta i predsjednik Udruženja.

Inicijativu za domaćinstvo Federalnog takmičenja/natjecanja podnosi predsjednik Udruženja u koordinaciji sa Aktivom direktora/ravnatelja i uz izjavu o pristanku buduće škole-domaćina.

Izuzetno, Federalno takmičenje/natjecanje za pojedine discipline (kao npr. balet, klavirski ansmbli, akademske kategorije, udaraljke i sl.) iz razloga tehničkih mogućnosti (specifična sala i/ili instrumentarij) organizuje se u pravilu u Sarajevu gdje postoje ti kapaciteti.

Odluka o mjestu i vremenskom okviru Federalnog takmičenja/natjecanja se u pravilu donosi do kraja tekuće nastavne godine za sljedeću godinu. Do kraja kalendarske godine Savjet će precizirati Propozicije Federalnog takmičenja/natjecanja, Pravilnik o radu žirija Federalnog takmičenja/natjecanja, sastav žirija i dr.

Član 3.

Savjet Federalnog takmičenja/natjecanja je najodgovornije tijelo Udruženja zaduženo za organizaciju i provedbu Federalnog takmičenja/natjecanja kao jedne od najznačajnijih djelatnosti. S obzirom na svu složenost organizacije i provedbe ove aktivnosti, uloga, značaj i odgovornost Savjeta je od iznimne važnosti i u njemu u pravilu participiraju najiskusniji članovi Udruženja.

Član 4.

Odredbe ovog Poslovnika obavezne su za sve članove Savjeta, kao i za sva druga lica koja učestvuju u radu ili prisustvuju sjednicama Savjeta.

Gramatička terminologija korištenja muškog ili ženskog roda za pojmove u ovom Poslovniku uključuje oba roda.

KONSTITUISANJE SAVJETA

Član 5.

Savjet je izvršno tijelo Upravnog odbora Udruženja i njemu odgovara za svoj rad. Članove i predsjednika Savjeta imenuje Upravni odbor.

Savjet ima 7 - 15 članova od kojih je jedan predsjednik Savjeta.

Savjet ima stalni dio članova (mandat 4 godine sa mogućnošću reizbora) i povremeni dio članova (mandat 1 godina sa mogućnošću reizbora). Povremeni dio članova Savjeta bira se svake godine sukladno disciplinama koje su na programu Federalnog takmičenja/natjecanja te godine.

Stalni dio članova Savjeta čine:

- jedan član ispred Upravnog odbora, predsjednik Savjeta
- jedan od potpredsjednika Udruženja u svojstvu koordinatora Savjeta
- jedan član ispred Aktiva direktora/ravnatelja
- jedan član Udruženja iz reda istaknutih pedagoga

Povremeni dio članova Savjeta čine:

- predstavnik škole-domaćina predstojećeg Federalnog takmičenja/natjecanja
- šefovi ili predstavnici pojedinačnih stručnih aktivna ili predstavnici srodnih aktivna (gudači, puhači/duvači, i sl.) čije su discipline na programu predstojećeg Federalnog takmičenja/natjecanja

Osim u slučaju predsjednika Udruženja učešće u radu Savjeta nije u koliziji sa bilo kojom drugom funkcijom u Udruženju.

Član 6.

Predsjednik Savjeta je u pravilu najstariji izabrani član iz dijela stalnih članova Savjeta, sa dugogodišnjim iskustvom i razumijevanjem problematike organizacije takmičenja/natjecanja. Predsjednik Savjeta ne može biti istovremeno predsjednik Upravnog odbora, predsjednik ili potpredsjednik Udruženja. Osim predsjedavanja na sjednicama Savjeta, predsjednik Savjeta proaktivno djeluje u svim segmentima organizacije takmičenja/natjecanja, te usko sarađuje sa predsjednikom i potpredsjednicima Udruženja i Upravnim odborom.

Koordinator Savjeta je jedan od izabranih članova Savjeta, u pravilu potpredsjednik Udruženja. Njegova uloga je ključna za uspješno odvijanje procesa organizacije Federalnog takmičenja/natjecanja, a odnosi se na komunikaciju sa članovima stručnih žirija Federalnog takmičenja/natjecanja, sinhronizaciju rada stručnih žirija i koordinaciju između Savjeta, stručnih žirija, Organizacionog odbora i škole-domaćina Federalnog takmičenja/natjecanja.

NADLEŽNOSTI SAVJETA

Član 7.

- Savjet Federalnog takmičenja/natjecanja obavlja slijedeće poslove i zadatke:
- provodi zaključke i druge odluke koje je donijela Skupština ili Upravni odbor, a koje su u vezi sa organizacijom i provedbom Federalnog takmičenja/natjecanja
 - po potrebi formira komisije za izradu ili doradu određenih segmenata Propozicija Federalnog takmičenja/natjecanja ili Pravilnika o radu žirija Federalnog takmičenja/natjecanja
 - razmatra, utvrđuje i daje na usvajanje Upravnom odboru prijedlog, izmjene i dopune Propozicija Federalnog takmičenja/natjecanja
 - razmatra i usvaja prijedlog, izmjene i dopune Pravilnika o radu žirija Federalnog takmičenja/natjecanja
 - razmatra i usvaja prijedlog, izmjene i dopune Kodeksa djelovanja i ponašanja članova i sekretara žirija za vrijeme trajanja Federalnog takmičenja/natjecanja
 - razmatra i potvrđuje prijedloge članova žirija Federalnog takmičenja/natjecanja
 - aktivno sarađuje sa Organizacionim odborom i školom-domaćinom oko svih segmenata organizacije Federalnog takmičenja/natjecanja
 - za vrijeme održavanja Federalnog takmičenja/natjecanja Savjet je u stalnom je zasjedanju, aktivno prati odvijanje takmičenja/natjecanja, nadzire rad stručnih žirija, analizira kriterije za ocjenjivanje, te rješava eventualne žalbe i slično
 - u okviru svoje domene odgovornosti podnosi Upravnom odboru izvještaj o održanom Federalnom takmičenju/ natjecanju
 - vrši i druge poslove u skladu sa Statutom i aktima Udruženja

Član 8.

U slučaju proširenja djelokruga Udruženja na povremene djelatnosti kao što su festivali, konkursi ili smotre (Statut Udruženja, član 8.) Savjet Federalnog takmičenja/natjecanja u koordinaciji sa Upravnim odborom preuzima ingerencije da učestvuje u organizaciji ovih djelatnosti.

PRAVA I DUŽNOSTI ČLANOVA SAVJETA

Član 9.

Članovi Savjeta imaju pravo da budu redovno i blagovremeno obavješteni o svim pitanjima potrebnim za vršenje funkcije člana Savjeta.

Član Savjeta je dužan da redovno prisustvuje sjednicama i aktivno uzima učešće, a u slučaju spriječenosti blagovremeno elektronskim putem obavijestiti sekretara Udruženja.

Član Savjeta ima pravo i dužnost da proaktivno djeluje u smislu promocije ukupnih aktivnosti oko održavanja Federalnog takmičenja/natjecanja, a posebno u okviru rada stručnog aktiva kojem pripada.

Članovi Savjeta u pravilu borave za vrijeme održavanja Federalnog takmičenja/natjecanja u mjestu održavanja kako bi bili u prilici da aktivno prate odvijanje takmičenja/natjecanja i u stalnom zasjedanju rješavaju eventualne situacije ili unapređuju tok takmičenja/natjecanja. Stalni dio članova Savjeta je prisutan sve vrijeme Federalnog takmičenja/natjecanja, a povremeni dio članova Savjeta je prisutan u dane održavanja njihovih disciplina.

Savjet po procjeni, a u smislu dodatnog nadzora i analize kriterija za ocjenjivanje može zadužiti pojedinog člana da bude prisutan tokom cjelokupnog odvijanja pojedine discipline kao i tokom zasjedanja žirija, bez prava diskusije.

Savjet po procjeni i u slučajevima opravdanosti ili hitnosti djelovanja, može zadužiti pojedinog člana da se uključi i participira u radu stručnog žirija u skladu sa Pravilnikom o radu žirija Federalnog takmičenja/natjecanja.

SAZIVANJE I ZASJEDANJE SJEDNICA SAVJETA

Član 10.

Sjednicu Savjeta priprema i saziva predsjednik Savjeta.

Poziv za sjednicu Savjeta dostavlja se članovima putem službenog maila najkasnije petnaest dana prije održavanja sjednice. Poziv sadrži datum, vrijeme i mjesto održavanja sjednice, prijedlog dnevnog reda, kao i eventualni materijal koji se odnosi na tačke dnevnog reda.

Izuzetno, u hitnim i opravdanim slučajevima, predsjednik Savjeta može sazvati sjednicu i u kraćem roku, a dnevni red za takvu sjednicu može predložiti na samoj sjednici.

U toku odvijanja Federalnog takmičenja/natjecanja zbog rješavanja određenih hitnih situacija Savjet je u stalnom zasjedanju i sastanak može inicirati svaki član Savjeta uz saglasnost predsjednika.

Član 11.

Sjednice se prema potrebi rada ili hitnosti djelovanja mogu održavati uživo, putem *online* platforme, elektronski ili telefonski.

Član 12.

Sjednicu Savjeta otvara i njenim radom rukovodi predsjednik Savjeta.

Sjednicu Savjeta u slučaju opravdane spriječenosti može voditi i drugi član Savjeta uz saglasnost predsjednika Savjeta.

Savjet može zasjedati i donositi odluke ako sjednici prisustvuje natpolovična većina članova Savjeta.

U slučaju nepostojanja potrebnog kvoruma, nova sjednica Savjeta se zakazuje naknadno u ovisnosti od hitnosti rješavanja tačaka dnevnog reda.

Član 13.

Sjednicama Savjeta mogu prisustvovati i uzimati učešća u diskusiji i predsjednik, drugi potpredsjednik Udruženja, te predsjednik Upravnog odbora, bez prava glasa prilikom odlučivanja.

Član 14.

Rasprava, u pravilu, traje sve dok svi članovi Savjeta ne završe sa svojim izlaganjem. Izuzetno ako predsjednik Savjeta misli da je pitanje dovoljno rasvijetljeno za donošenje odluke, može predložiti da se rasprava prekine i da se pristupi donošenju odgovarajuće odluke, odnosno zaključka.

ODLUČIVANJE

Član 15.

Po završenoj raspravi ili prihvaćenom prijedlogu bez rasprave Savjet donosi odluku ili zaključak u skladu s odredbama Statuta Udruženja i ovog Poslovnika. Glasanje se obavlja po redoslijedu prijedloga, ako ih ima više, a potom u cijelosti o pitanju koje je na dnevnom redu sjednice Savjeta.

Član 16.

Glasanje je javno.

Javno glasanje obavlja se dizanjem ruku na pitanje predsjednika Savjeta ko je "ZA", "PROTIV" ili "SUZDRŽAN" od glasanja.

Prijedlog, odluka ili zaključak se smatraju usvojenim kada se o njemu pozitivno izjasni više od pola prisutnih članova.

Kad je o pojedinoj tački dnevnog reda donesena odluka, o njoj se više ne može raspravljati.

Član 17.

Savjet može odlučiti da se sjednica prekine ako iz nekih opravdanih razloga tako zahtijeva većina prisutnih članova.

U slučaju prekida, predsjednik Savjeta odmah utvrđuje vrijeme (datum i sat) kada će se sjednica nastaviti. Savjet također može odlučiti da se pojedino pitanje skine s dnevnog reda i delegira za rješavanje Upravnom odboru.

Kada se iscrpi dnevni red sjednice Savjeta, kao i u slučaju njenog prekida, predsjednik Savjeta zaključuje sjednicu.

VOĐENJE ZAPISNIKA

Član 18.

O radu sjednice Savjeta vodi se zapisnik koji vodi sekretar Udruženja.

Zapisnik se mora sačiniti najkasnije sedam dana od dana održavanja sjednice. Isti se dostavlja se svim članovima Savjeta.

Akte koje donosi Savjet potpisuje predsjednik Savjeta.

Važniji zaključci i odluke Savjeta mogu se objaviti na web stranici Udruženja po procjeni i odluci Savjeta.

Svi materijali čuvaju se trajno u arhivu Udruženja.

ZAVRŠNE ODREDBE

Član 19.

Ovaj Poslovnik stupa na snagu danom donošenja.

Izmjene i dopune ovog Poslovnika mogu se vršiti isključivo na način i po postupku koji je predviđen za njegovo donošenje.

Broj: 32/10-26

Sarajevo, 19. 06. 2026. godine

Predsjednik Udruženja

prof. dr. Senad Kazić